


Lisa dan Rahsianya




Disokong oleh:

**YAYASAN
HASANAH**
 A foundation of Khazanah Nasional

 **WCC**
Women's Centre for Change
Pusat Kesedaran Wanita



Lisa ialah seorang kanak-kanak berumur sembilan tahun yang suka menyanyi. Di rumah, setelah menyiapkan kerja rumah, Lisa akan menyanyi kepada adik perempuannya semasa ibu bapanya menyediakan makan malam.



Satu hari, semasa makan malam,
ibu bapa Lisa memberitahunya
bahawa Pak Cik Jin akan datang
tinggal bersama mereka untuk
sementara waktu. Pak Cik Jin ialah
adik kepada ibu Lisa.




Beberapa hari kemudian,
Pak Cik Jin tiba. Dia membawa
beberapa permainan papan
untuk Lisa sekeluarga.




Lisa mula bermain permainan tersebut dengan Pak Cik Jin.




Selepas itu, bermain permainan papan menjadi suatu kebiasaan untuk keluarga Lisa.



Satu hari, Pak Cik Jin terdengar
Lisa menyanyi kepada adiknya.
Pak Cik Jin memberitahu ibu bapa
Lisa yang dia sangat berbakat.



Pak Cik Jin memuji Lisa dan memberikan hadiah kepadanya.



Lisa sangat gembira dan
mengucapkan terima kasih.



Satu hari, ketika Lisa sedang menyiapkan kerja rumah di dalam biliknya, Pak Cik Jin masuk ke dalam bilik Lisa. Dia memberitahu Lisa yang dia boleh membantu Lisa menyiapkan kerja rumahnya.



Pak Cik Jin duduk di sebelah Lisa.
Dia memeriksa kerja rumah Lisa
dan memberi Lisa ‘high five’ kerana
semua kerja rumah Lisa betul.



Semasa makan malam, Lisa memberitahu ibu bapanya bahawa Pak Cik Jin membantunya menyiapkan kerja rumah. Ibu bapa Lisa sangat gembira. Mereka berkata ini memberikan mereka lebih masa untuk melakukan kerja-kerja rumah, menyiapkan makan malam dan menjaga adik Lisa.




Sekarang, Pak Cik Jin datang ke bilik Lisa setiap hari untuk membantu Lisa menyiapkan kerja rumahnya. Lisa dan Pak Cik Jin banyak bersempbang.



Pak Cik Jin meletakkan tangannya
di atas bahu Lisa. Dia berkata,
“Kamu sangat istimewa, Lisa.”
Lisa sangat gembira.



Satu hari, semasa Lisa sedang
menyiapkan kerja rumahnya,
Pak Cik Jin masuk ke dalam
bilik Lisa dan menutup pintu.




Dia duduk di sebelah Lisa seperti biasa. Tapi kali ini, dia menyentuh paha Lisa.



Pak Cik Jin memberitahunya, “Ini cuma satu permainan... kerana kamu istimewa.” Lisa berasa tidak selesa dan cuba menjauhkan diri. Pak Cik Jin memberitahu Lisa, “Jangan beritahu sesiapa pun tentang perkara ini sebab tak ada orang yang akan percaya kamu.”



Perkara yang sama berlaku
keesokan hari dan hari-hari yang
seterusnya. Lisa tidak tahu apa
yang perlu dibuat. Dia takut.
Dia berhenti menyanyi kepada
adiknya.



Ibu Lisa bertanya kepadanya,
“Lisa tak apa-apa ke? Dah lama
ibu tak dengar Lisa menyanyi.”
Lisa berdiam diri. Dia nampak
Pak Cik Jin memerhatikannya
dari tangga rumah.



Pak Cik Jin turun ke bawah dan bertanya, “Hey! Kita makan apa malam ni?” Ibu Lisa ketawa dan menjawab, “Pizza!”




Di sekolah, Lisa menjadi sangat pendiam. Kawan baiknya Rani bertanya kepadanya, “Ada masalah ke Lisa? Kenapa kamu senyap sangat? Kenapa kamu tak bermain dengan kami lagi?” Lisa hanya menggelengkan kepalanya dan tunduk.



Rani memandang Lisa. Dia berkata,
“Kamu nampak sedih. Ibu saya kata,
jika ada sesuatu yang membuatkan
saya sedih atau takut, saya mesti
beritahu seseorang. Saya tak boleh
rahsia kannya. Jadi beritahulah saya.
Kenapa kamu sedih?”




Selepas beberapa ketika, Lisa memandang Rani dan berkata, "Pak Cik Jin... menyentuh saya... saya tak suka. Dia buat begitu setiap hari dalam bilik saya... ketika ibu dan ayah menyediakan makan malam di dapur. Saya sangat takut." Kemudian Lisa menangis.




Rani berkata, "Kamu perlu beritahu ibu bapa kamu." Lisa berkata, "Saya tak boleh beritahu mereka kerana mereka sangat sukakan Pak Cik Jin. Lagipun Pak Cik Jin kata mereka tak akan percayakan saya."




Sebaik sahaja Rani pulang ke rumah dari sekolah, dia memberitahu ibunya, Puan Mala, tentang apa yang diberitahu oleh Lisa. Puan Mala sangat terkejut dan memberitahu Rani yang dia akan mendapatkan pertolongan untuk Lisa. Malam itu, Puan Mala menelefon Puan Julia, guru kelas Rani dan Lisa.




Keesokan paginya, Puan Julia memanggil Lisa dan bertanya kepadanya apa yang berlaku. Lisa menceritakan segalanya kepada Puan Julia.




Puan Julia berkata, “Lisa, kamu mesti berasa sangat takut. Pak Cik Jin kamu tak sepatutnya buat macam itu kepada kamu. Memang bagus kamu tak merahsiakan perkara ini dan memberitahu Rani. Sekarang, kita kena pastikan perkara ini tak berlaku lagi.”



Puan Julia menelefon ibu bapa
Lisa untuk datang ke sekolah dan
memberitahu mereka apa yang
terjadi.



Ibu bapa Lisa sangat terkejut.
Ibu Lisa memeluknya dan berkata,
“Ibu minta maaf di atas apa yang
berlaku kepada kamu. Ibu tak tahu.
Apa yang dilakukan oleh Pak Cik Jin
memang salah. Lisa sangat berani
kerana memberitahu Rani dan Cikgu.”




Ayah Lisa berkata, “Kita akan buat laporan polis sekarang. Pak Cik Jin tak boleh tinggal dengan kita lagi. Apa yang Lisa buat memang betul. Jangan risau. Kami akan pastikan dia tak sakiti kamu lagi.”



Kedua ibu bapa Lisa memeluknya.



**Ingat: jika kamu terima sentuhan yang tidak baik, jangan rahiakiannya.
Beritahu seseorang mengenainya.
Itulah cara untuk kamu menghentikan perbuatan tersebut.**



Isikan bulatan dengan nama orang yang kamu percaya dan yang boleh membantu kamu.



Pusat Kesedaran Wanita adalah sebuah organisasi bukan berkeuntungan yang ditubuhkan untuk membendung keganasan terhadap wanita dan kanak-kanak serta mempertingkatkan kesaksamaan gender dan keadilan sosial.

Penulis

Prema E. Devaraj

Penterjemah

Hajar Abdul Rahim, Nadila Daud,
Salma Rasid, Asmar Bakhari

Kartunis

Azmi Hussin

Lakaran dan Reka Letak

C-Square Sdn Bhd, Penang

Penerbit

Pusat Kesedaran Wanita

Disokong oleh

Yayasan Hasanah

© 2020, Pusat Kesedaran Wanita, Pulau Pinang

www.wccpenang.org

wcc@wccpenang.org

WCC Penang